



Visoki predstavnik u posjeti Sjedinjenim Američkim Državama

Visoki predstavnik Valentin Inzko ove sedmice se nalazi u Washingtonu, uoči obraćanja Vijeću sigurnosti Ujedinjenih naroda o statusu implementacije mira u Bosni i Hercegovini.

Na sastancima sa zamjenikom pomoćnika državnog sekretara Matthewom Palmerom i drugim visokim zvaničnicima SAD-a jučer u Washingtonu, visoki predstavnik je informirao sagovornike o toku i ishodu osmih općih izbora u BiH, izazovima koji će se nalaziti pred novoizabranim vlastima te angažmanu međunarodne zajednice u zemlji.

„Građani Bosne i Hercegovine i međunarodna zajednica imaju velika očekivanja od novih vlasti, koje treba što prije formirati. Hitno i odlučno provođenje reformi neophodno je da bi se ostvario napredak u procesu pridruživanja EU ukoliko BiH želi ispuniti obaveze prema svojim građanima i međunarodnim partnerima“, rekao je visoki predstavnik.

Visoki predstavnik Inzko također je izrazio žaljenje zbog činjenice da je tokom predizborne kampanje fokus bio na pitanjima koja produbljaju podjele i ličnim napadima, skupa sa generalnim nepridavanjem pažnje stvarnim pitanjima sa kojima se zemlja suočava. „Prvi prioritet mora biti ekonomija i iznalaženje načina da se obrne trend da mlađi ljudi – najvitalniji dio stanovništva – odlaze u velikom broju,“ dodao je Inzko.

Visoki predstavnik će se u New Yorku sastati sa više ambasadora stalnih misija pri UN-u.

Njegovo obraćanje Vijeću sigurnosti Ujedinjenih naroda planirano je za utorak, 6. novembra.